

## Kijilikoau Kariau Jang John 2 JOHN

*Oarlap in Kijilikoau oauwe*

*Kariauin Kijilikoau Jang John* insingdihjang in mengin poahn “Armaj Mahu” oang “Li kajampwal apel nah jerihkan;” ioar me woahwoahki mwomwohdjohn wija kij apel sowoahkan. Audoapoa, ioar koahkoahlik in limpoakpene apel kaweid in mweijang jounpadahk likamw kan apel arai padahk kan.

### **Audoapoa in Oarlap**

Sapin Kijilikoau 1-3

Kajampwal in Limpoak 4-6

Koahkoahlik jang Padahk Likamw 7-11

Kadoariheklahn Kijilikoau 12-13

<sup>1</sup> Jang me Mahu —

Oang li kajampwal, apel oang nah jerihkan, ma ngoahi mehlel in ipwilki; a jaudi ngoahi oar doari pwa pel irai ohroj ma kidal mehlello kin ipwilki kamwai; <sup>2</sup> pwa ma mehlello kin minmine ipasai, apel pirin minmine ipasai anjoau ohroj.

<sup>3</sup> Koahs jamasai apel Jesus Christ, Nihn Jahmmo, kioang kisai kalahngan, mahk apel popohl, pwa mehpuwai en minminehr ipasai ki mehlel apel limpoak.

*Mehlel apel Limpoak*

<sup>4</sup> Ngoahi perenkihda koalik oai kidalda pwa epwi nihmw jerihkan kin mourki me mehlello,

in doahr kojoneddok ma Jahmmo kioang kisai. <sup>5</sup> Doari, ngoahi poaki ipoamw, li kajampwal, pwa kisai ohroj en ipwilpene. Me jaudi kojoned kapw oau, ma ngoahi insingkihwehng kamwai, pwa ioar kojonedwa ma kisai oaloo jang in sapdahu. <sup>6</sup> Limpoak ma ngoahi kajalehwe woahwoahki pwa kisai en peikkoang kojoned in Koahs kan. Pwa ioar kojonedwa ma kamwai ne rong in sapdahu: kamwai ohroj en mohmohmourki mour in limpoak.

<sup>7</sup> Armaj likamw dihrdir ne aluhpijoang nehn jampah, irai johpwa kin nimen kidal pwa Jesus Christ wia armajla. Joangoan armaj pwiai, ioar irai joun pisi armaj, apel irai ma imwinsihihn Christ. <sup>8</sup> Doari, kamwai kalke pein kamwai, pwa kamwai en joah luhj jang paihok ma kisai ne koadoahkoahda, a kamwai en oaloo dupukoa pwon.

<sup>9</sup> Ma emen ma joah oalooahda padahk in Christ apel joah soangdihoang, a wihwia pein injene, Koahs johpwa mine ipoa. A ma emen ma oalooahda padahk oauwe apel soangdihoang, Jahmmo apel Nahu mine ipoa. <sup>10</sup> Doari, ma emen pirin indoa ipamwai, a johpwa wahdohng kamwai padahk oauwe, kamwai joah kajamwohng nehn umwamwai, apel joah rahnmwahuwi. <sup>11</sup> Pwa emen ma pirin rahnmwahuwi joangoan armaj mene, ih pirin pel pwilihla joang nauna kan ma ih kin wia.

### *Kadoariheklahn Lal*

<sup>12</sup> Sikesik dir ma ngoahi nimen sikoahng kamwai, a ngoahi johpwa nimen insingehki ingk apel peipa; pwa ngoahi koapwoarpwoarki pwa

ngoahi pirin alwe apel sikesikkoang kamwai,  
pwa asai peren en unjekla.

<sup>13</sup> Nihn rioamw li kajampwal nah jeri kan  
kadarwe irai rahnmwahu.

**Mokilese Bible**  
**Matthew and Mark in the Mokilese language of**  
**Micronesia**

Copyright © 2019 Mokilese Bible Translation Committee

Language: Mwoakilloa (Mokilese)

This is a draft translation. Please check back often for updates at <https://eBible.org/mkj/>.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-07-03

---

PDF generated using Haiola and XeLaTeX on 3 Jul 2024 from source files dated 3 Jul 2024

4097fd30-31ee-5fdc-8d01-bc0facef348a